



Battacor per il turissem

Conny Hürlimann fa ina bilantscha dals emprims 100 dis en uffizi.

10



Viamala Notte, divertiment nocturn

Il program da Erwin Dirnberger persuada cun humor, istorgia e bler variaziun.

11

südostschweiz

LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch

Tschentau il binari al success

■ (anr/gv) Als examens d'emprendissadi han 30 emprendists sursilvans contonschiu uonn la nota 5,3 e dapli. Quei munta ina nota el rang. Culla excellenta prestaziun, han ils giuvenils aviert las portas ad in success professiunal. La gronda part dils giuvenils ambiziunai vul buca seruassar silas arbargias. La scolaziun supplementara stat el center. L'Agentu-

ra da novitads romontscha portretescha ils emprendists da success e fa l'entschatta cun Yannick Flepp da Sedrun. El ha terminau igl emprendissadi d'electroinstalatur culla nota 5,7. Ils campiunadis da professiun ein sia emprema finamira, il studi dalla electrotecnica la proxima.

> PAGINA 6

Realisar ils proxims quater onns

Il project per la colligiaziun dallas vias da bike ella regiun dil Gottard s'avonza

DA HANS HUONDER / ANR

■ Il project «Labirint da mountainbike Gottard» pren plaun a plaun conturas. L'evaluaziun dallas pusseivladads ei fatga, il proxim temps ston ils pertuccai directamein prender posiziun.

«El decuors dils proxims quater onns lein nus realisar quei project. Probablamein vegn quei a succeder en etappas», di Dieter Bogner, meinaproject dil Program San Gottardo. La basa per colligiar las regiuns Surselva, Val Blenio, Leventina, Ursera e Goms-su ina cun l'auter ei scaffida. Ils documents tgei ch'ei necessari ein avon maun. Tut en tut se tracta ei da bunamein 200 kilometers vias da velos, surtut per ciclists sportivs che vulan era se divertir denter auter sin descensius pretensiusas. «Ils emprems decuors cun las vischnauncas ed ils posts responsabels dils cantuns han giu liug. Ussa ha ei num scalfir dapertut la basa legala per quella purschida e silsuerter da reglar la finanziaziun», declara Bogner. Cun la basa legala manegia el ils plans directivs che ston



La regiun dil Gottard duei daventar attractiva per ciclists da muntogna che tscherchan vias pretensiusas.

vegnir approbai dils gremis politics.

En singulas regiuns ein quels gia avon maun. La colligiaziun ei cumbinada cun cuosts d'investiziun approximativs da rodund

2,4 milliuns francs: «Ils resuns dallas autoritads pertuccadas ein positivs.»

Ina part dils cuosts stuessen las vischnauncas surprendre. Tgei pusseivladads finanziaias ch'exis-

tan schiglioc, ei aunc da clarir. Il project duei esser ina part concreta dil Program San Gottardo 2020 – 2024.

> PAGINA 3

Louis e sia Tour des Grisons

■ (anr/sr) La Tour des Grisons, quei ei ina tura cun velo da corsa dad 800 kilometers distanza e 16 000 meters d'altezia sur 14 pass. Igl ei stau la sfida privata da Louis Flepp ch'ei oriunds da Mustér. Sia finamira ei stada da circumdar il Grischun sil velo e quei enteifer treis dis e duas notgs dils 19 – 21 da fenadur. «Corporalmein ei l'energia duvrada si suenter du-

disch uras, naven da lu setract'ei d'ina historia mentala» ha Flepp declarau cuort avon sia partenza en discuors cun l'Agentura da novitads rumantscha.

Pigl um da 64 onns che stat cuort avon la pensiu eis ei stau in cumbat cun ni encunter sesez – semplamein per veser sch'el sa e po aunc quei – ed el ha pudui.

> PAGINA 6



In cuort stop ha Louis Flepp fatg a Mustér nua ch'ina delegaziun dalla claustra spigava sil velocipedist.

FOTO S. ROTHMUND

Cuntinuaziun da l'acziun «Ûn cour per la regiun»

■ (anr/afi) In Engiadina Bassa as vaiva avant desch ons inizià l'acziun «Ûn cour per la regiun» e montà divers defibrillaturs illa regiun.

Uossa vain la sporta cumpletada cun l'installaziun da defibrillaturs a Ftan ed a Tarasp. Sco cha Ursula Grimbichler, l'instructura da la Società da samaritans da Scuol, es l'adöver da quists apparats relativmaing simpel. «La chaista chi cuntegna uschè ün apparat as poja drivir, in ün cas urgiant, cun schmat-schar il pom cotschen ed in quel mumaint cumainza l'indriz a tschüblar», declara ella. Las chaistas sun robustas e concipidas per da tuottas oras e temperaturas e funcziunan cun üna batteria.

In mincha cas racumond'la d'avisar avant co chi's va per l'apparat il clom d'agüd 144. In Svizra patischan bundant 8 000 persunas l'on d'üna fermada dal cour. Iniziant da l'acziun «Ûn cour per la regiun» d'eira Joachim Koppenberg, il directur dal Center da sandà Engiadina Bassa e tanter oter meidi specialisà pel salvamaint.

> PAGINA 9

1800 meters plattas e crappa

DAD AUGUSTIN BEELI / ANR

■ L'jamna vargada ein 50 emprendists dalla gruppa Implenia stai en acziun sin territori da Nagens sur Laax e Flem. Il mirschetg da Nagens ei buca in ordinari. Ed el ei buca il sulet.

Denter Pèz Grisch e Crap Masegn ein las alps Nagens da Laax, Mughels da Schluein e Sogn Martin da Sagogn. Sin quei intschess dat ei differents mirs che s'audan tier in sistem da totalmein siat chilo-

meters. Igl ein mesiras ch'il cantun ha promoviu avon rodund 150 onns. Entuorn gl'onn 1870 han ins anflau ina metoda per impedir ch'ils animals crodien el ver senn dil plaid «da Surcrap giu». Ins ha baghegiu rempars, respectiv mirs.

Ad in da quels liungs mirs da schurmetg sededichescha la fundaziun Pro Laax cun in project da restauraziun sur pliras etappas. Cun Matthias Götsch, in specialist da mirs schetgs, ha ella an-

flau in menader tecnic competent e cun liunga experientscha. Valérie Frede, geologa dalla gruppa Implenia, habitescha a Laax. Ella ei responsabla pils 200 emprendists dalla gruppa. Cun sia intermediaziun eis ei gartegiau d'instradar la stad 2018 in camp da lavur. L'jamna vargada ha puspè ina gruppa dad emprendists passentau in jamna els cuolms dil Grischun.

> PAGINA 5



Il mir cunfinescha las pastiras aultas da Nagens encunter la greppa da Platt'Alva. Lunsch sut ves'ins gl'Uaul Grond e Flem.

FOTO A. BEELI

Gio per la 4. gEDA

■ (anr/gns) Igl «Zauberwald» a Lai è aint igl frataimp en'occurrenza stimada da vigl e gioven aint igl meis da december avant Nadal. Chest onn vign ad aver li la 7avla ediziun. A madem mument ò er li a Lai la Tour de ski e chegl pe la 4.geda. Igl organisatours da tottas dus occurrenz as uneschjan sport ed art per ena seira. Igl 27

da december 2019 ò li aint igl «Zauberwald» l'avertura dalla Tour de ski. Hannes Parpan, igl president digl comite d'organisa-zion dalla Tour de ski è incanto digl fatg tgi sport ed art sa preschaintan a madem mument ad en grond public.

> PAGINA 8



20030

Servetsch d'abunents e da distribuziun: tel. 0844 226 226 mail: abo@somedia.ch



**Daniela Vincenz (49),
emploiada mercantila,
Castrisch**



**Tgei muntada ha il romontsch per
Vus?**

Per mei munta el fetg bia. Per l'ina eis ei miu lungatg-mumma ed il lungatg da famiglia. Era ella professiun hai jeu adina duvrau stedi il romontsch. En duas vischnauncas nua ch'jeu hai luvrau ei quei stau essenzial demai ch'ils presidents tschintschavan buca romontsch.

Co promoveis Vus il romontsch?

Jeu vi promover el cun applicar il pledari grond. Duvrar quei vocabulari electronic ei per mei ina buna moda da luvrar efficient cul lungatg romontsch. Per tuttas sorts lavurs administrativas ei quei in grondius sustegn persunal.

Tgei avegnir ha il romontsch?

La giuventetgna ei gl'avegnir dil romontsch ed jeu sperel ch'ella fetschi vivon d'iever da nies bi lungatg. Cul romontsch san ins seprofitar fetg d'emprerder lungatgs jasters, cunzun talian e franzos, mo era engles. Jeu s'encorschel quei tier mes affons ed era tier memezza ch'il saver romontsch ei adina stau in avantatg e buca in disavantatg.

100onns.ch

reclama

**Südostschweiz
informiert**

Topaktuelle Nachrichten
aus Ihrer Region
von Montag bis Freitag
ab 18 Uhr.

Nur auf
TV Südost-
schweiz

südostschweiz

Biebein 50 uras – quasi nonstop - sil velo da cuorsa

Louis Flepp ch'ei oriunds da Mustér ha dumignau la Tour des Grisons

DA SUSI ROTHMUND / ANR

■ **Sco Louis Flepp – che habitescha a Wädenswil - ha declarau cuort avon che semetter sin viadi per la Tour des Grisons, ha probablamein aunc negin fatg quella tura aschia e sil velo. La sfida persunala digl um da 64 onns ei stada da circumdar siu cantun d'origin sil velo. Ina sfida ch'el ha dumignau entifer treis dis e duas notgs.** Il venderdis allas 7.00 ha Flepp entschiet sia Tour des Grisons a Cuera e la dumengia viers las 15.00 eis el arrivau a Jenins nua ch'ina massa amitgs ed enonuschents ni fans han beneventau el. Quei sunter haver schau davos el cul velo da cuorsa 800 kilometers distanza e 16 000 meters d'altezia. Sin sia tura ha el giu d'ascender e descender 14 pass e quei va ellas combas.

Siu giavisch ei stau da bandunar la zona da comfort sco velocipedist da hobi che fa turas dil di maximalas dad otg tochen dudisch uras. Entschiet cul sport da velo ha Flepp dil reminent pér igl onn 2003. La tura ha pia menau igl um che lavura ella branscha d'IT entuorn il Grischun cun pigns deturs ell'Italia ed ell'Austria. Empau dapertut e perfin d'uront la notg spitgavan enonuschents e nunenonuschents agl ur dalla via ni sils pass per encuraschar il sportist. Sco el ha puntuau hagi quei fatg plascher narr, encuraschau enorm e gidau da tener atras la tura. Adina puspei ha el era survegniu support da siu team e da persunas che han telefonau ni scret ad el per salidar ed encuraschar. Silla pagina www.teamflepp.ch ei ei numnadamein stau pusseivel da suandar il viadi via GPS-Tracker e leutier han interessai saviu star sil current grazia a fotografias e commentaris dil team.

Tura beinplanisada

Il 2014 ha Flepp fatg la tura entuorn l'Austria, numnadamein il « Race Around Austria » cun 2 200 kilometers distanza e 30 000 meters d'altezia. Atgnamein haveva Flepp gia planisau da far siu project d'« Ultra-Cycling » il 2017,

ha lu ord motivs da sanadad denton stuiu dar giu quel cuort avon il start. Ussa, dus onns pli tard ha el viliu saver ei. Tenor Flepp eis ei stau in project persunal, la sfida da mirar sch'igl ei en sia vegliadegna aunc pusseivel da sefocussar aschi fetg sin sesez e la finamira ch'ei gartegia da contonscher quella. In cumbat cun ed encunter sesez e negin auter. El ei sepinous bein, ha planisau miniziusamein las etappas e recognoschau mintgina. Tschu e leu ha ei giu num far adattaziuns dalla ruta pervia da plazzals da construcziun ni auter. « Risguardond il grond engaschi da planisar la Tour des Grisons fuss ei d'engrau sch'enzargi vulesse sorprender quella ed eventualmein era commercialisar, » ha Flepp declarau e manegiau ch'el seigi aviarts per propositas, sez lessi el denton buca dispert pli far la tura ni organisar cuorsas.

Cramfs ed emeziuns

Ier avonmiezdi havein nus telefonau cul sportist che era tier siu fegl a Jenins per serevegnir dils strapazs. La notg dalla dumengia sin gliendisdis hagi el durmiu detg bein sch'ins risguardi las circumstanzas. « Igl entir project e ch'jeu hai dumignau la sfida, ha svegliau enorm bia emeziuns, » ha Flepp declarau e concediu ch'el hagi duas, treis ga propi stuiu morder per buca dar si, mo cun quei havevi el gia quintau ordavon. Empau ord il concept seigi el vegnius pervia dils problems corporals che hagian mudergiau el aschi baul sco aunc mai. Gia al San Bernardino hagi el numnadamein giu cramfs massivs e quei hagi irritau el mentalmein. Ina massascha dil dir sut entruidament d'ina fisioterapeuta amitga hagi lu purtau levigament. Insumma ha Flepp gadiu in support enorm da siu team che ha accompignau el duront igl entir viadi. Treis dis e duas notgs ha siu viadi sil velo da cuorsa cuzzau. Ver 50 uras sil velo, denteren « Powermaps ». Sulet duas uras hagi el durmiu duront quei temps. Denteren cuortas fermadas pils basegns humans e magliau e buiu ha el per gron-



A Mustér ha ina delegaziun dalla claustra spitgau sin Louis Flepp. La claustra sponsurescha al velocipedist e siu team ina fin d'jamna el hotel dalla claustra.



Louis Flepp ed ina part da siu team che ha accompignau el sin sia Tour des Grisons.

FOTOS S. ROTHMUND

da part sil velo. Per part seigi ei era stau in cumbat encunter la sien, ha Flepp concediu. A Zernez, avon la davosa etappa, ha el duvrau 30 minutas pausa per in tractament e 30 minutas per in « power-

nap » e lu ha il viadi alla victoria persunala saviu cuntinuar. Sia resumaziun: « Igl ei absolutamein grondius tgei ch'jeu sun vegnius da contonscher cun agid da miu team. »

Sco en ina gronda famiglia

Yannick Flepp culla megliera nota grischuna dils emprendists electroinstallatur

DA GIUSEP VENZIN / ANR

■ **Yannick Flepp da Sedrun ha priu temps per la schelta dalla professiun. «Jeu hai absolvii tschun fuffergnadis.»** Alla fin dil temps da scola saveva el ch'el vegli far in emprendissadi el qual el stoppi luvrar sil baghetg. «Biro fuss nuot per mei.» In fuffergnadi ha il giuven Tuatschin fatg tier Energia Alpina a Sedrun e leu ha el era fatg igl emprendissadi sco electroinstallatur. Dacuort ha el terminau quei emprendissadi culla eccellente nota 5,7. «Energia Alpina ha purschiu a mi bunas cundiziuns. Jeu sun sesentius sco en ina gronda famiglia.» Tier l'interpresa da Sedrun ha Yannick Flepp era gadiu dabia confidanza. «El tierz onn d'emprendissadi hai jeu astgau duvrar igl auto da fatschenta ed hai saviu exequir persuls lavurs sil baghetg. Quella honur hai jeu gadiu.»

Star vidlunder

Che Yannick era in bien imprendist, ha il patrun encorschiu beinspert. Siu engaschi e ses attestats han documentau quei.

Tier igl emprendissadi ha el frequenta la scola media professiunala ed era terminau quella cun ina nota eccellente. «La professiun ha fascinau mei ed jeu hai fatg tgunsch», ha Yannick detg. «Jeu sun denton era staus promts d'emprerder pliras uras tochen che jeu hai capiu tut.» Star vidlunder numna il giuven electroinstallatur quei.

Il Tuatschin stat vinavon vidlunder. Ils proxims tschun onns ein reservai per ina sfida extraordinaria e per il studi. Yannick separticipescha als campiunadis professiunals e sunter frequenta el la scola professiunala dil fatg a Rapperswil.

L'emprema finamira ei il «bachelor» dalla electrotecnica.

Sper la professiun che stat senza dubi el center da Yannick Flepp, gauda el buns temps ensemen cun amitgs fagend sport. El numna treis sports favorits, unihoc,

mountainbike ed ir cun skis. Malgrad quels buns temps en Surselva, lai il giuven da Sedrun aviert tuttas opziuns pigl avegnir. «Nua che la professiun meina mei sai jeu buc. Cul studi ella Bassa ei bia pusseivel.»



Yannick Flepp ha finiu igl emprendissadi d'electroinstallatur culla megliera nota dils emprendists grischuns.

FOTO G. VENZIN